



UPA 2015/89
12. marts 2014
Aqqaluaq B. Egede

**Uunga siunnersuut: Aalisarnej pillugu Inatsisartut inatsisaata allanngortinnera pillugu Inatsisartut inatsisaat nr. xx, xx.xx 2015-imeersoq.
(Inuussutissarsiutigalugu aalisarsinnaanermut akuersissutit tunniunneqartarnerat ingerlaannartarnerallu pillugit allannguutit)**

(Aalisarnermut, Piniarnermut Nunalerinermullu Naalakkersuisoq)

Aalisarnermik inuussutissarsiut inuussutissarsiutitut inuppassuarnik katersuuffiusoq naluneqanngilaq. Aamma ilisimavarput inuussutissarsiummi tassani allatut aqqissuussinissaq pisariaqarluinnartoq. Aalisagaqassutsimik piujuartitsineq tassaavoq inuit nunatsinni atugarissaarnerannik piujuartitsiniarneq. Piujuartitsineq tassaavoq nunatta inuisalu aningaasarsiornikkut atugartuussutsikkullu piujuartumik patajaassuseqartikkumanerat. Piujuartitsineq tassaavoq meeqqat inuusuttut utoqqaallu atugaannik ajorseriartitsinaveersarneq.

Imaappoq, oqaaseq piujuartitsineq aalisartumuinnaq tunnganani aamma nunatta inuisalu atugaannik aalajangiisuvoq. Piujuartitsinermik eqqartuigaanni tassaannaanngilaq pinngortitaleriffiup aalisartullu, aammalumi poltikkerit kisimik akisussaaffiat. Inuiattut pisuussutivut ataatsimut nakkutigisassaraagut piujuartinniarassaraagullu.

Inatsisartut inatsisissaattut siunnersuut naalakkersuisunit saqqummiunneqartoq Inuit Ataqatigiinniit isumaqataaffigaarput. Taamaakkaluartoq inatsisip atuuttussanngortinneratigut aalisagaqassutsimik aqutsilluarnissaq tamakkiisumik nakkutigineqalersinnaanngilaq. Ilisimavarpummi massakut naalakkersuisuusup Inatsisartuni ilaasortaanermi aalisarfimmi titarniliinissamik siunnersuuteqarnermigut killeqanngitsumik aqukkuminaatsumillu aalisarfimmik atuuttussanngortitsinikummat.

Titarniliilluni killeqarfiliineq annertuumik pisortat nakkutilliinerannik ajornartorsiuteqartitsivoq, aamma inuit ataasiakkaat unioqqutitsisunngortinneqarnerannik kinguneqarsimasoq ilisimalereerparput. Pissutsit taamaannerat qanoq Aalisarnermut Piniarnermut Nunalerinermullu Naalakkersuisup iliuuseqarfigilersaarnerai oqaaseqaat iluatsillugu apeqqutigaarput.

Naalakkersuisut inatsisissatut siunnersuutaat uppernarsaataavoq aalisarnerup inuussutissarsiutitut inunnik katersuuffiusimanera aalisagaqassutsimut naleqqussartariaqartuuneranik. Inatsimilli allannguinnikkut pisinnaalertussa qanoq aalisartut ataasiakkaat ataasiakkaarlugit killilersorinnaanissaannut periarfissaqalernissaq, qanoq ilusilersorniarnearpa?

Sinerissap qanittuani qaleralinniarnep iluani aqqitassat imaannaanngillat, taamaattumik inatsisissatut siunnersuut aalisarnermut piniarnermullu ataatsimiititaliami suliareqqitassanngorlugu ingerlatipparput.